

CAPUT XVI.

Ex neglectu officiorum, de quibus hactenus tractatum est, frequens oritur obligatio restituendi, quod debetur; eaque peculiarem expositionem poscit.

ARGUMENTUM.

CXXXVIII. Notio satisfactionis et re-stitutionis.

CXXXIX. Restitutio ex re accepta.

CXL. Injusta acceptio.

CXLI. Culpa gradus ac limites.

CXLII. Quæ culpa restitutionem pos-
cat?

CXLIII. An sola theologica, ut vo-
cant?

CXLIV. Restitutio ob damnum ab ani-
mali vel servo datum.

CXLV. Aliave damna cum culpa data.

CXLVI. Præstatio culpa in contrac-
tibus.

CXLVII. Si post initium contractum
res nostræ et alienæ simul pericli-
tentur.

CXLVIII. Restitutio ob læsam æquali-
tatem in contractibus onerosis.

CXLIX. Restitutio ex quasi contractu.

CL. Quis teneatur restituere, si plures
damnum dederint.

CLI. Restitutio ob consilium pravum.

CLII. Ob præstitum consensum.

CLIII. Ob datum recursum.

CLIV. Ob participationem damni dati.

CLV. Ob negativos imputationis modos.

CLVI. Quid et quantum oporteat re-
stitui.

CLVII. Tempus facienda restitutio.

CLVIII. Locus et sumptus, quibus fit
restitutio.

CLIX. Cui restituendum?

CLX. Concursus creditorum.

CLXI. Impotentia restituendi.

CLXII. Si damnum sit irreparabile.

CLXIII. Ri res interit

CLXIV. Impotentia ex inopia debi-
toris.

CLXV. Impedimentum ex parte cre-
ditoris.

§. CXXXVIII.

INJURIA stricte dicta, quæ est violatio juris perfecti aliorum (1), non intelligitur fieri sine animo nocendi vero, aut interpretative tali; quia nec ignorari passim jura perfecta aliorum, nec sine ejusmodi animo lœdi possint. Animus nocendi *verus* præsumitur, quando actio ex se et præsentibus adjunctis juri perfecto alterius adversatur; isque est *dolus*, vel *dolus malus*, sive malitiosa facti in læsionem alterius destinatio. Si qua actio alteri jure perfecto debita est, ejus omissione dolosa esse potest. Animus nocendi *interpretativa dictus*, censetur omissione diligentiae debitæ, sive ejus, quam adhibere quisque tenetur, ne jus perfectum aliorum

lœdat, vocaturque *culpa*. Duo distinguenda in injuria sunt, I. *offensa* lœsi, quatenus hic in se aut bonis suis impetratur, molestia, justo dolore, aliquando etiam terrore vel ignominia afficitur, ejusque imo et aliorum securitas ac tranquillitas turbatur; multis enim minatur, qui uni facit injuriam. II. *Damnum* lœso illatum per injuriam, qua ipsi demitur quidquam de iis, quæ jure perfecto tenet (2). *Jus naturæ*, ut inferre injuriam prohibet, sic illatam reparari jubet: secus enim continuatur, et singulis momentis infertur velut nova. *Reparatio* *offensæ* fit per *factionem satis* proprie dictam: *reparatio* *damni* per *restitutionem*; quæ voces, etsi confundantur sèpenumero, re tamen differunt, ac altera ab altera separari possunt; altera item gravis, altera levis censeri. Qui vi adhibita alterum spoliare re sua attentat, nec tamen prævalet; gravem injuriam irrogat; at damnum non dat. Qui uni horologium furto, alteri per rapinam aufert, æquale damnum, non æqualem injuriam facit. *Satisfactio* igitur *offensam* res-picit, etsi adjunctum damnum non habeat, ac propria est *justitiæ* *vindicativæ*: fieri potest in bonis alterius ordinis, ac *injuria* erat, eamque æqualitatem poscit, quam *medium rationis* vocant; quia per rationem fit æstimatio tum *offensæ*, tum personarum, quibus accommodanda est *satisfactio*. At *restitutio* *damnum* res-picit, cuius redintegratio est: jure interno ante omnem judicis sententiam fieri debet, et per se quidem in eodem genere, in quo læsio contigit, ac *medium rei*, sive perfectam rerum æqualitatem exigit, ut, qui ob damnum illatum minus habet, ac debebat jure per-fecto, per *restitutionem* obtineat idem, vel æquale. Hinc *restituere* idem est, ac *iterato aliquem statuere in possessionem* vel *dominium rei suæ* (3). Hæ notio-nes perquam fœcundæ sunt, nec sine corollariis relin-qui debent.

(a) Potest quis in dominium vel possessionem rei suæ aut juris restitui, quam sine *injuria* amiserat. Hinc *restitutio* latius patet, quam *injuria*; ut si restituitur pignus, locatum etc.

(b) Restitutio vi notionis postulat, ut quis antea in possessione rei vel juris fuerit, atque ut res, qua sit restitutio, sit eadem, vel priori æquipollens. Utrumque aliter se habet in *solutione*, a qua proin differt. Qui dat pretium pro emto tritico, solvit; qui idem in genere dat pro eo, quod mutuo acceperat, restituit.

(c) Restitutio in reparando jure perfecto, atque eo versatur, quod alter habuit in $\tau\omega$ suo. Si cui dono, quod ab eodem antea emi, non fit reparatio prioris juris, sed nova translatio. Si extreme indigentii quidpiam dem ex obligatione gravi caritatis, nihil restituo; quia non do, quod alter habuit in $\tau\omega$ suo, aut quod jure perfecto exigere potest.

(d) Restitutio reducit ad æqualitatem, quod inæqualiter ablatum est (4); et aliquis reddendo, quod accepit simpliciter, reducit ad æqualitatem. Ergo solum tenetur restituere tantum, quantum accepit. Igitur restitutio in duplum, triplum etc. ex lege positiva promanat, et satisfactionem respicit. At quamdiu mihi deest quidpiam de re mea, vel consecutarii rei, aut lucro cessante vel damno emergente (quod utrumque nomine *interesse* venit), tamdiu mihi non restitutur plene atque ad æqualitatem; quia minus habeo, ac jure perfecto debebam habere. Non tamen eo spectat restitutio, ut plus habeam postea, ac ante. Hinc si quod incrementum rei meæ, quam alter juste vel injuste detinuit, ex sola istius industria, non ex re ipsa accessit, id mihi restitui non debet, sed penes detentorem manet (5).

(e) Ad $\tau\omega$ suum non tantum pertinet dominium rei, sed etiam iura connata acquirendi (6) et *creditum*, quo nomine intelligitur jus perfectum exigendi ab altero rem ex pacto vel quocunque modo perfecte debitam (7). Qui ergo alterum a consecutione boni, quod acquirere poterat, vel ei debebat, mediis injustis, cœm mendaciis, vi, fraude impedit, is facit, ut minus habeat, quam alias haberet; et obligationi restituendi subjacet. Si quis solam alterius spem consequendæ rei vel probabilitatem consecutionis injuste intercipiat, non rei, sed speci estimationem arbitrio prudentis viri restituet; præsertim cum multa inopinato incident, ne quis re sperata potiatur. Cavendum etiam, ne cupiditas habendæ rei pro jure habeatur, et injuria obtendatur, que nulla est; exemplo sunt operarii, qui ob longiorrem laborem plus postularunt, quam conventum fuerat (8).

(f) Quia obligationibus aliorum perfectis in statu absoluto satisfit per actiones negativas (9): obligatio autem restitutio positiva est, quæ in faciendo et dando consistit, atque etiam sine præcedente ieiuria locum habet; idcirco erit ea obligatio perfecta hypothetica; atque indaganda est hypothesis sive ratio sufficiens, ex qua positiva et perfecta obligatio restitutio provenit. Ejusmodi hypothesis vel ratio sufficiens in scholis nuncupatur *radix restitutio*, que multiplex esse potest. Et quia obligations affirmatiæ respiciunt adjuncta loci, temporis, personarum; præterea facultatem et opportunitatem

poscent; quibus deficientibus expleri nequeunt; intelligitur, cur de adjunctis facienda restitutio, et causis excusantibus agendum sit.

(1) §. XVII. (d.)

(2) Ib. (f.) Offensam, quæ inest in violatione juris perfecti, proprius exprimit vox generalis, *injuria*: damnum notat vox *lesio*; L. V. decretalium extat titulus 36 conjunctum de injuriis et damno dato.

(3) S. Thomas 2, 2, q. 62, a. 1. Sie l. I, §. 31. D. de vi, et vi arm. de eo, qui vi dejectus est, statuitur: « pristina causa restitui debet, quam » habiturus erat, si non fuisset dejectus. »

(4) S. Thomas loc. cit. a. 3. — (5) Idem a. 6, ad 1. — (6) §. XV. (c.)

(7) L. 10, 11, 12. C. de V. S. — (8) Matth. XX, v. 11. seq. — (9) XVII. (a.)

§. CXXXIX. *Res accepta*, extans formaliter in se, aut in æquivalenti apud eum, cui illam tenendi jus non est, prima est radix restitutio; fructus, incrementa, et consecutaria ex re ipsa provenientia ad dominum rei pertinent. Unde instar axiomatum sunt duo hæc: 1. *res aliena clamat ad dominum*; perinde ut Tobias ex voce balantis hædi, ne quid alienum domi esset, vereri se significavit (1). 2. *Nemo cum alterius injuria, jactura et detrimento locupletari debet* (2). Ex his concludes:

(a) Si res apud dominum peritura naufragio, depradatione hostili, incendio, servata est, dum in aliena manu erat; non cessat esse res domini, prouindeque restitui debet.

(b) Quia amissa possessione jus ac dominium non amittitur (3); idcirco res aliena, si quo loco invenitur, et ab inventore tollitur, adhibita diligentia, ut ad dominum perveniat, curanda est (4).

(c) Etsi dominus ex re sua fructus non perceperisset; si iidem proveniunt alio dante operam; tamen ex re proveniunt, atque ad consecutaria dominii pertinent, et restituendi sunt. De possessore bonæ ac malæ fidei dictum est supra (5).

(1) Tob. II, v. 21.

(2) C. 48. de R. J. in VI et l. jure naturæ. 206. D. eod. l. nam hoc 14 D. de conduct. indeb.

(3) §. CXII. (b.)

(4) De rebus alienis inventis lex Mosaica disponit Deut. XXII. a. v. 1.

(5) §. CXXIV. (c.) et §. CXXV.

§. CXL. Altera restitutio radix vulgo statuitur *injusta acceptio*, seu *damnificatio active*, id est, actio, ex qua alteri damnum contingit, unde *injusta* dicitur *formaliter*, id est, cum peccato et conscientia noxa

conjuncta , aut materialiter injusta , ex se quidem cum peccato aut conscientiae noxa conjuncta , ut tamen oblio , inconsiderantia , præcipitania coram Dei et conscientiae tribunali excusationi locum præbeant. Quapropter talis actio dupli spectanda modo est :

(a) *In se*, considerando primo jus , obligationem , vel necessitatem , ex qua ponitur : secundo connexionem cum damno , utrum ex se perniciosa , cum damno , vel tantum cum periculo damni remoto , propinquo , proximo conjuncta : tertio gravitatem ipsius danni , quod ipsum , vel cuius periculum cum actione conjunctum est.

(b) *In animo agentis* ; an censeatur directe vel indirecte nocendi voluntatem habuisse ; an subito terrore , deliberate , plena , aut non plena advertentia , probabili ignorantia , oblivione actionem ediderit ?

§. CXLI. Notio doli ac culpæ , et multiplex istius gradus indicatus est supra (1). Cum vero nonnunquam perdifficile sit , limites inter dolum et culpam , inter varios culpæ gradus , inter culpam levissimam , et casum fortuitum discernere ; opus et nonnulla in eam rem annotare :

(a) In primis spectanda est natura negotii et actionis , ejusque adjuncta. Aliquando satis diligens et immunis a culpa censemur , qui eo modo rem facit , quo alias passim ab omnibus solet fieri ; uti sit in pulsanda campana , etsi tintinnabulum forte decidens hominem opprimat (2).

(b) Sunt quedam actiones per se et natura sua valde periculosæ , ceu transportare columnas , res fragiles , cum igne accedere ad locum , ubi magna est copia materiaæ , quæflammam cito concipit. Inde fieri potest , ut culpa in se levis spectatis adjunctis valde gravis evadat.

(c) In aestimanda culpa non id considerandum est , quid usu et experientia facti prudentiores cautioresque faceremus ; sed quid homines prudentes ejusmodi loco ac tempore passim agere soleant (3).

(d) *Casus fortuitus* , ut a culpa etiam levissima segregetur , in Romanis legibus dicitur is , cui resisti non potest (4). Superat igitur humanam prudentiam , quam viri etiam maxime providi ac solentes adhibere solent tum saltem , cum experientia nondum cavere didicerunt. Hinc dicitur *vis major* (græce *τευθια*) ceu lapsus fulminis , naufragium , terræ motus , vis aquarum ; eumque per se nemo prestare debet , nec imputatur , sed commiserationem parit. Alter de culpa disserendum est , etsi ea plena inconsideratione obrepserit : tum enim dici potest : per te stabat , quo minus id damni emerge-

ret : cur non advertisti animum ? debebas advertere , ac poteras etiam. Sane omnes ideæ ac voces , imo etiam juris sacri et profani dispositiones confundendæ sunt , si , quod per culpam fit , casus fortuitus nuncupetur.

(e) Notio *culpæ juridicæ* pariter supra data est ; sed veritas illius notionis videtur examinanda. Non nego , fieri posse , ut quis repentina terrore , aliave commotione , aut inadvertentia , obliuione id agat , ex quo alteri damnum sequitur , quin peccatum committere censeatur. Sed istiusmodi *culpa theologica materialis* , quamobrem *culpa juridica* vocitetur , non video. Forte quia jura præscribunt eam diligentiam , quam quis sine peccato ponitur omittere. Atqui jus naturæ , et sacrum positivum præcipit moderari animi motus , præscribit psallentibus devotionem , attentionemque , vetat mentiri. Quid ergo ? si quis involuntaria mentis inconstantia animo vagetur inter psallendum : si repentina iræ impetu prævertitur : si non advertenti mendacium ore effluit ; rectene has dices distractiones juridicas , iram juridicam , mendacium juridicum ? Sed fortassis ea dicetur culpa juridica , qua omittitur diligentia , quam adhibere non tenetur. At enim sic nulla erit omnino culpa , quæ vi notionis omissionem *debitæ* diligentiae exprimit ; nec quisquam in foro condemnatur ob eam causam , quod diligentiam omiserit , quam adhibere non debebat. Non igitur improbanda est eorum thesis , qui , cum adcurate loqui amant , uti necesse est in disciplinis , ita statuant : *Nulla est culpa juridica*. Sed ne de voculis litigemus , dicatur per me diligentie debitæ omissio , quæ ob inculpatam inadvertentiam peccato caret , culpa juridica ; quia in foro humano de actibus internis constare nequit. Si qua externe et in se culposa sit , in jure habebitur pro culpa.

(1) §. XLV. — (2) Casus extat in c. Joannes 23 de homicidio.

(3) Cajetanus in comment. S. Thoma , 2, 2 , q. 64 , 8 , memorabilem casum refert de quadam Hispaniæ principe , quæ cervam parvulam quasi familiarem et domesticam instar catelli alebat. At cum illam canes aliquando insequerentur , eaque in sinum dominae sue confugeret , hac tum quidem gravida canibus territa abortum fecit. Addit Cajetanus , hoc infortunium non solum ab ipsa regia principe non fuisse prævisum , sed nec a tot viris illustribus et sapientibus , qui ipsius curam habebant , eique assistabant , et ex qua regni successorem expectabant ; et tamen post factum omnes dicebant , non debuisse illam cum cerva ire in locum , ubi venatici canes aderant.

(4) L. in rebus . 18. D. commodati.

§. CXLII. Hisce præfixis notionibus subjungenda sunt principia , vi quorum ex injusta acceptione obligatio restitutiois emergit :

(a) Omnia consensu reparari debet damnum dolo datum , etsi qui dedit , nullum commodum ex damno dato referat ; nec interest .

directe dederit, an indirecte; si non cavit, ne sequeretur, aut si agendi jure caruit.

(b) Idem tenendum, si quis damnum dat culpa lata advertenter, etsi de cetero actionem ponat jure suo; quia quivis jure naturæ eam tenet in actionibus suis, ne alii damno sint, adhibere diligentiam ac circumspectionem, quam homines diligentes, non dissoluti, non leves ac temerarii adhibent in rebus suis. Quivis enim operam humana viribus accommodatam adhibere debet ne lœdat naturale jus.

(c) Qui actionem bona fide primo posuit, sed cuius effectum noxiūm dein animadvertisit; si illum, cum potest, non impedit, tenetur ad damnum reparandum; qui mala fide damnum præparavit, tenetur cum pari suo, imo etiam majore, quam innocentii imminet, periculo, illud impedire, retractare, removere. Jus enim naturæ, uti prohibuit eam præparationem; sic quovis momento, ut impediatur damnum, et periculum amoveatur, præcipit; secus tenetur ad restitutionem.

(d) Qui alterum impedit a consecutione boni jure perfecto eidem debiti, quounque modo impedit, suasu, vi, fraude etc. illud obligatur reparare; similiter et qui a consecutione boni alteri non debiti impedit modis injustis, ceu calumniis; pariter obligatur pro ratione spei, quam alter habebat.

(e) Qui actionem ponit jure suo, atque ex honesto fine, atque operam dat, ut par est, ne alteri damnum sequatur; si quod sequitur, id ipsi imputari non potest. Non enim videtur injuriam facere, qui utitur jure suo (1).

(f) Ex solo pravo affectu, aut voluntate inferendi malum, si actionem quis ponat jure suo, non oritur restituendi obligatio, uti si actor, testis, dum viam juris tenent, simul iniquo odio moventur in reum. Videre igitur oportet, utrum et quatenus actio externa in damnum injustum influat.

(g) Si qua actio de se indifferens per voluntatem pravam et affectum nocendi determinatur ad hoc, ut noxia et injusta sit, ea parit obligationem reparandi damnum, utpote ab illa actione proveniens.

(1) C. 31. de electione.

§. CXLIII. His quidem extra controversiam positis, ut opinor, inquirendum est, quid spectato naturali jure de culpa, ut vocant, juridica, sive illa actione statuendum sit, ex qua alteri damnum oritur, quin agens aut commodum vel lucrum habeat, aut verum ac formale peccatum commisisse dicatur. Vulgo quidem ita statuunt: *Nemo (secluso contractu) tenetur ad restitutionem damni a se illati, nisi in damno in-*

ferendo culpam admiserit theologicam contra justitiam. Interest, ut puto, ad perscrutanda principia naturalis juris, argumenta sic sentientium discutere.

(a) *Duae sunt, inquiunt, radices restitutionis, res accepta et injusta acceptio;* in praesenti hypothesi, cum, qui damnum dedit, non peccarit coram Deo, neque commodum aut lucrum ex sua actione habeat, neutra radix reperitur. R. Hoc dictum, quo aliis saepè locis utuntur, non principium est, sed petitio principii. Hoc ipsum enim ambigitur, utrumne *formalis* injustitia requiratur. Ad satisfactionem, eam requiri fateor; an ad restitutionem, vix audeo definire. Nam restitutionem præcedere debet inæqualitas: hæc autem sine peccato formalis induci potest; dum nimur alter ob factum alterius minus habet, ac jure perfecto ipsi competit.

(b) *Ubi peccatum non est, vera injustitia non est.* R. Ubi peccatum non est, utique injustitia peccaminosa non est: est tamen vera inæqualitas, et vera et efficax lœsio juris alieni, ac proin vera injustitia.

(c) *Damnum plena inadvertentia datum, est casus fortuitus.* R. Utique relate ad eum, qui damnum ab alio passus est; sed sic eidem erit casus fortuitus, si a latronibus expoliabitur. At si eum spectes, qui damnum dat, et quidem culpa lata, etsi rationem peccati nullo modo cognoscat; non potest ea culpa cum casu fortuito confundi, secus nec condemnatio judicis haberet locum (1). Repli-cant, esse casum *theologice fortuitum, non juridice fortuitum;* sed ita quidem nullo jure, nulla ratione, nulla nisi auctoritate distinguiunt, sumentes pro vero id, quod probare, non asserere deberent. Nam sensus ejus dicti hic demum erit; secundum theologos damnum sine peccato formalis datum tam parum reparandum est, ac secundum JCtos casus fortuitus.

(d) *Si in hac hypothesi, de qua agimus, damnum dans ad reparandum tenetur; tenebitur etiam amens, furiosus; tenebitur, qui rem alienam bona fide consumxit: tenebitur medicus, advocatus, judex, si ex opinione probabilissima agentes noceant.* R. 1. An hi etiam a Judice condemnari poterunt, vel condemnati tenebuntur? 2. His imputari damnum nullo modo potest; culpam committenti, etsi citra peccatum, id imputari, ac vitio dari potest, non ex malitia, sed ex facto, quod in se culpabile est. Alia est damnificatio materialis, alia culpa materialis, qua damnum datur. Dices, hi iidem jus alienum materialiter violant. R. Abusu vocum id per me dicas; at reipsa nequidem culpam materialem commit-tunt; quia nihil omittunt de diligentia debita; in quo ratio culpæ sita est: nihil ipsis omnium consensu imputari potest, sed totum casui fortuito tribuendum est, qui humanam diligentiam superat.

(e) *Qui damnum patitur, non potest esse rationabiliter invitus;*

cum alterius actio omnino involuntaria sit. R. Qui damnum patitur ob culpam latam alterius, indemnitatem a judice exigere potest. Igitur rationabiliter invitus esse potest. Ceterum hæc ipsa expressio, *rationabiliter, vel contra invitum esse*, omnino vagum et confusum habet significatum. Respiciendum est ad jus tam perfectum, quam imperfectum illius, qui invitus est. Jus domini non minus violatur culpa, quam vocant, juridica, ac theologica; non ratio peccati, sed factum ipsum nocet.

(f) *Obligatio restituendi est poena: hæc infligi non potest, ubi peccatum non est.* R. Nihil tam falsum, ac quod restitutio poenæ rationem habeat; hec enim in malo nocentis consistit: at restitutio in reparando jure læsi innocentis. Si mihi damnum dedisti, non ut malum tibi fiat, sed ne meum continuetur, peto. Si grave ac molestum id accidat tibi, tibimet imputa; quare non cavisti, uti omnes boni ac prudentes solent? Quisque ferre debet consecutaria actionis suæ, sive eam cum peccato ediderit, sive absque peccato; qui citra peccatum formale fit ebrios, æque ferre capitis dolores ac intemperiem stomachi debet, ac si crapulam theologicam, non tantum juridicam hausisset. Ceterum si quis poenæ vocabulo adhærescit; eam, quæ in obligatione restituendi inest, naturalem per me vocitet, sive ab ipsa natura culpa latæ affixam.

(g) *Qui damnum subiit ex culpa alterius, is quidem parte bonorum vel jurium spoliatus jam est: qui dedit, sua integra retinet.* In dubio melior est conditio possidentis, nec quisquam innocens spoliari debet re sua. R. Qui damnum subiit ex culpa alterius, spoliatus re sua dici non debet, nisi ex hypothesi adversantium, qui negant lædentem debere restituere, quantum nocuit. Fac enim debere; igitur, qui damnum subiit, loco rei destructæ retinet jus perfectum, ut tantundem reparetur. Atqui habere jus perfectum, ut tantundem reparetur, perinde est ac habere rem ipsam. Id quod exprimit juris digestorum regula: *is, qui actionem habet ad rem recuperandam, rem ipsam habere videtur* (2). Dein læsus, an laedens potiore jure censeatur innocens, ipsi, qui dissentient, dispiant, atque una videant, an læsus facto lædentis, vel potius sententia absolventum ab obligatione restituendi, spoliatus parte bonorum, vel jurium videri debeat. Accedit, quod eo etiam ex capite male utantur possessionis favore, quod non tam de jure reali, quam personali agatur.

(h) *Auctoritas negantium obligationem restituendi multo est major ac affirmantium.* R. Si numerandi sint auctores. c. Si examinandæ et ponderandæ rationes, pari jure negavero, ac alii affirmant (3). Ac puto, summæ auctoritatis esse decretalem Gregorii IX. C. ult. de injuriis. In qua explicanda non laborarent theologi tum, quando de voluntario et ratione peccati formalis tractant, modo cogitarent, de sola obligatione restituendi, quæ ex culpa lata provenit, non de peccato formalí in ea decretali agi. Similis culpa,

et consequens obligatio reparandi damnum in libro Exodi occurrit; qui locus in corpus juris canonici relatus est (4).

(i) Reliquum est, ut, quid sentiam ipse in re valde ambigua, aperiam; ac primo rationes, quibus opinio negativa nititur, haud magni ponderis esse, patet expendenti, quæ adhuc dicta sunt. Secundo, leges positivæ, quæ ex lege Aquilia actionem dant læso, valde æquæ sunt. Tertio, quia factum cuique suum, non adversario nocere debet (5); potior videtur causa læsi, quam lædentis. Sed an hæc æquitas tanta sit, ut naturali obligationi subjaceat, facile defendi haud potest; nam quarto ea obligatio restituendi, quæ ex re accepta, et malitiosa acceptance oritur ad jus proprietatis, ac dominii tuendum, omnino necessaria est, ita ut ea sublata obligatione, jus quoque proprietatis ac dominii tolleretur. At enim, cum fines rerum ac dominii suos gradus habeant, nec quivis gradus sub obligationem cadat; concludi non potest, extare jus naturale de reparando damno inadvertenter dato; cum id quidem jus ad tuendam gradu perfectiore proprietatem conducibile sit, non tamen ad eam tuendam intra justum gradum, sit necessarium. Atque hoc argumentum, etsi negativum videatur, ne communiorem sententiam abjiciam, multo plus apud animum meum valet, quam ea, quæ de culpa juridica passim disputari in scholis solent. Generatim loquendo, conformius æquitati est, ut, qui damnum dat culpa sua, etsi sine peccato det, id reparet. Sed fieri potest, ut generali æQUITATIS rationi alia obstet æQUITATIS ratio in peculiari hypothesi relucens. Si vir pauper et bonus involuntaria mentis aberratione rebus viri opulentí forte noceat; æquum videtur, ut nec pauperi humana fragilitas damno sit, nec dives copias suas ex tenuitate viri pauperis resarcire velit. Contra si vir opulentus similiter damnum det minus habenti, æquum est, ut compenset etiam non cogente judice; si denique par pari noceat absque animo nocendi, æquitati aptius satisficeri non videtur, quam si damnum inter se partiantur. Cum nemo sit hominum, qui naturali mentis evagatione, præcipitania, inconsideratione per omnem vitam non aliquando, ac forte saepè noceat alienis rebus; obligatio, si qua extaret, istiusmodi damna reparandi, videtur humano generi supra, quam par est, molesta futura, plurimisque anxietatibus obnoxia.

(1) §. CXLI. (d) — (2) L. is, qui. 15. D. de R. J.

(3) Vid. Panormitanus in c. ult. de injuriis et damno dato. Ludov. Engel tit. de injur. et damno dato n. 50. Decretalis Gregorii IX. c. ult. de injur. et damno dato, videtur integrum hic exscribenda: « Si culpa tua datum est damnum, » vel injuria irrogata, seu alii irrogantibus opem forte tulisti, aut hæc imperi-
» tia tua sive negligencia evenerunt: jure super his satisfacere te oportet, nec
» ignorantia te excusat, si scire debuisti, ex facto tua injuriam verisimiliter
» posse contingere vel jacturam. Quod si animalia tua nocuisse proponas, nihi-
» lominus ad satisfactionem teneris, nisi ea dando passis damnum velis liberare
» te ipsum: quod tamen ad liberationem non proficit, si fera animalia, vel quæ
» consueverunt nocere, fuissent, et quam debueras, non curasti diligentiam

» adhibere. Sane licet, qui occasionem damni dat, damnum videatur dedisse :
» secus est tamen in illo dicendum, qui, ut non accideret, de contingentibus
» nihil omisit. » Nota 1. Canones præcipue ad conscientiae forum respicere, et
Gregorium P. IX. hanc decretalem non rescriptsse parti cuidam litiganti vel
judici, causam ad se deferenti, quasi decisurus, quid in foro externo tenendum
sit, sed eam motu proprio edidisse. 2. Nulla suppetit ratio, ea verba : *si scire
debuisti*, restringendi ad ignorantiam proxime vincibilem, et ad culpam cum
formali peccato conjunctam. 3. *Nihil de contingentibus omittere*, idem est, quam
adhibere diligentiam ordinariam, quam homines prudentes ac cauti in istius-
modi re ac negotio adhibent; ea vero omitti potest ex involuntaria mentis aber-
ratione, ut proinde culpa, de qua Pontifex loquitur, sine formali peccato esse
queat. 4. Quando Pontifex inquit : *jure satisfacere te oportet*, non exprimit,
naturali, an positivo oporteat; et quamvis istuc fortassis respiciat, cum totam
decretalem ex principiis juris Romani contextuerit, tamen nec excludit naturale
jus, nec previam judicis sententiam expectari posse, ait.

(4) Exod. XXII. v. 6. etc. 5. *de injur. et damn. dat.*

(5) *L. factum. 155. D. de R. J.* Consonare videtur l. 84. ibid. « Non debet
» alteri per alterum iniqua conditio inferri. »

§. CXLIV. Qui ex culpa lata, quæ cum peccato
conjuncta non est, negant obligationem reparandi
damni provenire, nisi post judicis sententiam, id multo
magis referunt ad casum, quo nulla admissa est culpa,
uti *si quadrupes pauperiem fecisse dicatur* (1); aut
si quid effusum ex domo, projectum vel suspensum sit
cum damno prætereuntium (2); aut si servus tuus
damnum dederit, ut contra te moveri queat actio
noxalis furti, actio noxalis injuriarum etc. (3). *Hæ
leges*, inquit P. Concina (4), *ante judicis sententiam
non obligant; quia sic usu receptæ sunt.* Sed Vasquez
reparationem damni jure naturali debitam putat (5);
tum ob jus dominii, quo quisque res suas integras con-
servare, aut si læsæ sint, ut redintegrentur, exigere
potest: tum quod damnum a tuo animali, vel a tuo
servo datum a te quodammodo datum tum videatur;
ad te certe pertineat, ut, qui commoda rei habeas,
etiam incomoda feras. Hæc ratio æquitatis tanta est,
ut apud cultiores gentes plurimas lege sancita fuerit.
Ejusmodi legem habuere Hebrei (6); ab his pervenisse
creditur ad Phœnices; a quibus Solon eam sumpsit,
qui teste Plutarcho de pauperie a quadrupedibus data
scripsit; a Solone sumxit Plato l. 11. de Leg.; ab hoc
eandem accepere Romani. Neque culpa domini spectab-
atur; hac enim accidente gravior præfigebatur poena (7).

An vero hæc æquitas eam habeat vim, ut se sola obli-
gationem naturæ inducat, affirmare non ausim, nec
temere inficiari. Quæ præc. §. lit. i. disserui, huc
etiam videntur posse transferri.

(1) *Digest. l. IX. tit. I.*

(2) *Ibid. tit. III. de his, qui effuderint, vel dejecerint.*

(3) *Ibid. tit. III. de noxalibus actionibus.*

(4) *In epitome theol. Christian. l. IX. diss. II. q. 4.*

(5) *Opusculo de Restitut. c. 2. §. 2. dub. I.*

(6) *Exod. XXI. v. 28, 35.*

(7) *Ibid. v. 29, 36. Adde c. ult. de injuriis, superiori nota exscriptum.*

§. CXLV. Alii supersunt casus inter se discrepantes,
in quibus decidendis magnopere laborant tractatores
rerum moralium.

(a) Fieri potest, ut damnum grave detur cum culpa non plene
deliberata in ratione peccati; ceu *primo*, cum advertentia actus
est imperfectus in semisopitis, semebriis, præveniente motu ve-
hementi abreptis: *secundo*, cum quis bona fide judicat, ex omissione
majoris diligentia non oriturum damnum, nisi leve, aut periculum
gravioris damni valde remotum esse.

(b) Aliquando fit, ut cum plena rationis advertentia agens gra-
vitatem damni materialis, ut ajunt, seu objectivi nullo modo co-
gnoscat; uti qui gemmam projicit alienam, pro re modici valoris,
levique damno id habens.

(c) Contra si quis cognoscat totum damnum materiale, quod dat,
ignorare potest gravitatem *formalem*, ut ajunt, idque cum uno
actu, tum pluribus successivis, ceu in furtis minutis contingit.

(d) Denique etsi quis grave damnum se dare cognoscat, tamen
excessum ignorare potest, ut longe majus id sit, ac in mentem
venerat (2).

(1) Non parum profecit, ut opinor, qui casus hosce dispares alterum ab altero
acute internoscere didicerit. Decisiones passim extant apud auctores, quamvis
minime concordes sint. Conferri potest Gratianus *caus. XV. q. 1.* Ubi quidam
abuti videntur verbis S. Augustini *C. 9. ibid. relatis*; non enim de obligatione
reparandi damni, sed de ratione peccati S. Doctor ibidem agit.

§. CXLVI. *Tertia restitutionis radix in contrac-
tibus hæret, eaque duplicitis generis; est enim in his
obligatio quædam primaria ex vi contractus, ut præ-
stetur, solvatur, restituatur id, quod in contractum
deductum fuit: altera accessoria vel secundaria, qua*

reparari debet damnum ei datum , quocum contractus est initus ; atque hoc ultimum , quoniam cum præcedenti tractatione velut producto filo cohæret , primo loco disquirendum est. Idque totum his capitibus constat.

(a) Pro varietate contractuum variis diligentiae gradus præstituti sunt contrahentibus , ne alter alteri damnum det ; proindeque variis culpæ gradus erunt spectandi ; ut de obligatione restituendi constare possit. Sunt contractus , qui in commodum solius dantis cedunt : alii in commodum utriusque contrahentis : alii in commodum solius accipientis.

(b) Jus naturæ poscit , ut in conservanda re aliena , quæ nostræ fidei committitur , adhibeamus diligentiam , quam vir prudens , non levus , ac dissolutus in re sua vulgo adhibet , id est , diligentiam communem et ordinariam , qua vitatur culpa lata ; ejusmodi enim diligentia , ne aliis , rebusve aliorum noceamus , semper adhibenda (1). Atque id generatim valet pro *contractu* , qui in solius dantis *commodum cedit*. Sed inde facile intelligitur , valde æquum esse , et rationi consentaneum , ut in contractibus , qui in nostrum æque ac alterius commodum cedunt , majorem diligentiam adhibeamus , ne quid detrimenti alteri proveniat , quam si nihil de nostro , sed unius dantis commodo ageretur ; ergo *in contractibus* , qui cedunt in *commodum utriusque contrahentis* , non tantum lata , sed etiam levis culpa vitanda , ac si commissa fuit , etiam præstanta est. Si hæc consecutionis et æquitatis ratio porro continuatur , cito infertur , valde æquum et consentaneum esse rationi , ut , si contractus in commodum solius accipientis cedit , major diligentia , nequid damni in dantem proveniat , adhibenda sit , quam si in communem mutuamque utilitatem utriusque contrahentis cederet. *In contractu* , qui cedit in utilitatem solius accipientis , vitanda ab hoc culpa etiam levissima , et si admissa fuit , præstanta est.

(c) Æquitatem in hisce regulis subesse nemo non videt ; sed an tanta sit , ut culpa levus ac levissima ex naturali obligatione præstari omnino debeat , non pauci ambigunt. Sunt , qui generatim statuunt , neminem teneri majorem alienis conservandis rebus operam ac diligentiam adhibere , quam homines passim adhibent in rebus suis. Id quidem , si de contractu agitur , ex quo accipiens totum commodum habet , perquam abhorrete a communi sensu atque usu opinor. Qui enim levus ac dissoluti animi non est , singulari cura providet , ne is , a quo beneficium accepit , ex ipso benefacto damnum a se ferat. Ac si qua res aliena , quæ in nostris manibus est , vel casu fortuito laedatur , aut pereat , omnes vulgo dolemus , angimur , affligimur , excusamus , asseveramus , nulla id nostra culpa accidisse. *Heu! heu!* Domine mi! clamabat discipulus prophetæ , cuius securis e manubrio avulsa , cum ligna cæderet , in

fluvium excussa est , addens causam doloris ac vociferationis : et hoc ipsum mutuo (commodato) acceperam (2). Unde putant nonnulli , spectata naturali æquitate commodatarium etiam casum fortuitum recipere ; ex quo concludes , eo potiore ratione culpam etsi levissimam ab eo præstandam esse. Necesse non est , ut de vi naturalis obligationis multum hoc loco decerteremus ; cum profanæ ac sacræ leges extra controversiam sint. Quare istarum potius vis tuenda est.

(d) Leges civiles ac canonicae , quæ pro vario contractuum genere ad cavenda contrahentium inter se damna certam diligentiam præscribunt , culpamque oppositam præstari jubent , vim et obligationem conscientiae continent tum ad eam adhibendam diligentiam , tum ad culpam , si qua commissa est , præstandam , saltem si pars læsa præstationem quoque modo vel extra judicium requirit. Sæpe enim , qui beneficium dederunt , tam benevolo animo sunt , ut illud non minuere vel retractare exactione , sed liberali remissione augere velint. Leges tamen , si quid exigant , sibi assistentes habent , contra quas , qui damnum dedit , nulla se exceptione tueri poterit ; nam et justæ sunt , ac naturali æquitati perquam consentaneæ : ac censetur quisque negotia inire modo ac forma , quæ legibus præscripta , atque usu recepta est ; neque eadem pro poenalibus haberri possunt , quæ judicis sententiam poscant , neque præsumptione fraudis aut culpæ theologicæ nituntur.

(e) Secundum præcedentem thesin de præstanta in contractu culpa , quatuor hæc sunt statuenda : *Primo* , culpam latam in contractu præstat is , qui illam commisit , etsi nihil commodi ex contractu habeat , ceu depositarius (3). *Secundo* , culpam levem præstat , eam committens in iis contractibus , qui in commodum utriusque contrahentis cedunt. *Tertio* , culpam levissimam præstat , qui illam committit in contractu , ex quo solus committens commodum percepit , ceu in commodato (4). Mandatarium non modo si se offert , vel summam diligentiam spondet , sed universe ad præstantam culpam levissimam leges adstringunt ; quod is contractus ex amicitia et abundantia fidei ducat originem (5). Idem præscriptum est nautis , cauponibus , stabulariis (6). *Quarto* , casum fortuitum ferre debet dominus rei , nec alius præstare tenetur , nisi qui eum expresse vel tacite in se recepit , vel per culpam et moram eidem causam reddit (7). Unde patet , quod debitor generis ceu mutuarius , vel qui pecunias depositas ita cum suis miscuit , ut discerni non possint , easum fortuitum tanquam domini ferant.

(1) §. CXLII. (b) — (2) IV. Reg. VI. v. 5.

(3) §. 3. Inst. quibus modis re contrah. oblig. non ex culpa , sed dolo teneri dicitur. At enim culpa magna vel lata in legibus dolo equiparatur. l. 226. D. de V. S. item l. aduersus mensorem. §. 1. D. si mensur falsum mod. dixerit. Notatu digna sunt verba l. 32. D. depositi : « Si quis non ad eum modum , quem hominem natura desiderat , diligens est (nisi tamen ad suum modum curam in deposito præstat) fraude non caret ; nec enim salva fide minorem iis , quam